

台州文獻叢書

上海古籍出版社

喻長霖等
編纂

台州府志

長霖

六

卷六〇至卷七五

台州府志卷六十

風俗志上

風俗一門赤城志惟載守令陳襄等勸諭文七篇意在士大夫表率以爲民先新志及康熙府志記載較詳其餘各縣志互有異同其已載者茲不贅述謹述要略著於編

浙分東西浙西三府杭嘉湖俗近吳中浙東八府金衢嚴處鄰皖閩贛甯紹台溫皆濱海風俗略有異同台郡縮甯紹溫三府之中爲浙省東南奧區山海雄峻而地瘠民貧俗安畎畝火耕水耨漁獵山樵工商之業不振然士重廉恥代產偉人宋明以來人文蔚起卓然爲浙東生色傳所謂沃土之民不材瘠土之民好義吾郡殆足以當之矣台分六縣闔郡磽齋民不阜財臨甯黃太皆濱海天仙山縣地尤貧瘠太史公云倉廩實而知禮義衣食足而知榮辱蓋王者富而後教霸者富而後強將欲振興吾台殆必自足民始矣

台郡負山面海交通阻僿甯紹台同一道然甯郡長於經商滬濱東南巨鎮而甬人執其牛耳粵漢各商埠凡外舶幅湊之地甬人輒先染指焉台人惝乎後也紹郡酒利甲天下刑名之幕友關卡之員役各衙門之胥吏皆紹人專之而吾台無有也他若杭人長於仕宦台不能也嘉

湖利擅蠶桑台不知也跼處萬山之中崑崙以農立國風氣錮塞工商着着讓人宦途亦晨星落落以貧富論台與甬不啻百與一之比視紹亦遠遜焉吾台患貧如此故百事難於振興此其大原因也

台郡庶而不富生齒日繁人浮於地田不敷耕天仙尤甚或散之四方覓食勞工黃太人稔稼穡赴杭嘉湖甬佃農以億萬計往往春出冬歸健者或積資置產不返佔客籍焉論者以此爲台人生記一大宗亦重可憫也

台人尊賢重士貴粟重農士多尙名檢賤刀筆耕氓韋足自安有足多者然狷介近狹刻厲近伎是己非人之習譏嘲傾軋之風沿爲俗尙細民尤甚動爭錙銖相仇結訟此所短也然老成之士不乏長者故猶重詩書而敦禮讓近新說勃興朋黨漸起長厚之俗替而排擊之風萌舊時禮教日以陵夷識者憂之至出家僧道之多窮氓溺女之盛山僻匪徒嘯聚爲盜者之夥強半無業游民窮無所之挺而走險者也其餘餬口四方壯者耕佃弱者流亡黠者稗販竄者奴婢拯而救之變齊變魯此一大問題也

臨爲首縣領袖六邑富亞黃太而遠勝天仙民俗摯勁自好之士往往崛起不凡卓然特立其

劣者爲之乃徒急功利競錐刀甚或仗悍好訟各樹黨徒環相妒憾莫能相下蓋峭厲奮發之氣雜以誇詐浮競之風良莠不齊此其蔽也

臨邑地勢集中吏庭邇在咫尺六縣公益每聚府城薦紳樂善樹德無形忠信既薄玉石混淆間有攬權利蝕公帑漸至黨爭益烈旗幟日新此風俗之隱憂至於東南際海藪盜藏奸西北蠻風聚族鬪患氣所積習爲固常生聚富教之謀移風易俗之事此匪易且暮期矣

黃巖農田利亞太平而饒於各縣故諺云黃太熟六縣足然人浮於地耕氓終歲勤動僅資事畜西鄉地瘠山民尤苦有終年食諸不得粒食者深山窮谷或染盜風東南土膏肥沃既饒耕獲又擅魚鹽之利路橋水陸集中農商較盛迤南山徑窅遠習俗僑悍匪徒隱伏時生事端北鄉俗質而靜山民尤樸蟋蟀山樞之習耕田鑿井之風匪各鄉所能及矣

黃俗既判饒瘠風亦絕異蓋地瘠則生計艱人重節流往往靳惜絲粟飴苦嗇嗜故西鄉多因惜財而致富地饒則商務興人重開源往往水陸貿遷居奇龍斷故東南每因經商而致富百里之內俗尙不侔然惜錢太過節衣縮食其餘幾何故西鄉究無甚富之民東南稍知用財然苦乏鉅資又囿舊習故亦無富商大賈足媿甯紹者至草茅下士崛起尤艱窮巷無書寒家無

帖倖而釋褐見聞既隘成就亦淺志士奮興寥寥鮮遘由域於地勢紐於錮俗積習約之然也
太平由黃分縣土沃於黃粟帛魚鹽之利冠於六邑吾台之上腴也然貧民習勤富民習奢若
畫鴻溝故勞農負販終日勤劬而巨室豪家以奢相炫婚嫁動逾萬金甚至涉訟或傾家冶游
或破產醫藥或不貲此土風之積弊舊志載明初士紳衣皆土縑非達官不得用紵絲女子非
受封不得長衫束帶上田不過畝一金今則衣飾競尙侈靡畝值一二百金與舊俗成反比例
矣

黃太米多而長官禁糶釀成奸徒漏米出洋之弊此地方官迫之然也豐年販米大利所在而
官偏禁之於是狡黠姦民朋比漏海遊惰土棍藉端截米百弊叢生經言毋曲防毋遏糶遏糶
是第一虐政米貴流通賤則糶出貴則糶入此不易之常理近則米價日昂乃官禁日苛甚至
樂歲蔽糶而漏卮遂成尾閭驅民而爲姦商巨慝亦錮台民壞台俗之一端也

寧海風氣剛勁近蠻志士尙義百折不回而儉徒爲姦亦往往閔不畏死平民則耕織勤儉作
息自安不識官長此足尙也而獷悍之徒不安畎畝每至白刃相仇甚或相率盜劫流爲匪類
海寇繁多伯仲臨邑皆風俗之憂也

甯邑海岸綿長天漲沙塗最廣土民墾闢遺棄尙多三門灣天然軍港絕好商埠前意大利人欲之國家亦圖之近則南洋羨之甬人涎之總之開闢三策不外民築塘商築路而國家築軍港斥鹵海濱不難變成巨壤今國力民力皆弱或先從築路下手南自健跳達海游西由海游達天台北達奉象吸收全台及甯紹商務商務盛則地利興至魚鹽天產利源不竭改良振興尤係要圖惟海疆民風蔽俶開通改步今尙未易言也

天台地瘠人滿治生艱窘民風勁健勤嗇耐苦田不敷耕多務工作閤邑通衢西通紹東通甬南通臨輿夫挑工生計所入成一大宗自海輪驟通路商銳減勞工下士轉徙異鄉近來負販商民繹絡外出瘠土好勞迫於地勢倘日後浙閩省道告成台山郵路四通則振商務來百工可圖開拓且台山名勝擅名字內仙釋最盛有洞天福地之說日後省道既成富商達士游屐聯翩開通錮僂而氣象將爲一變當拭目俟之矣

天民果敢尙氣骨鯁性成勇於急人之難然亦好尋私仇故聚族械鬪之風頗盛兩族相爭動輒叱咤聚衆長官莫敢如何蓋負氣任俠而量狷窄有觸卽發故刀筆健訟之風亦盛至鄉間溺女視爲習慣爭利瑣瑣析及秋豪皆生計阨迫使然也

仙最瘠縣生計尤高山峻水冽平疇極少稼穡維艱鄉民節衣縮食焦神極能果陌積著惟日不足舊志稱人好使氣鬪訟輕生吝財兄弟別籍女生多不育喪葬溺風水婚嫁論財禮此等敝俗至今未改由謀生窘阨相迫而成然克勤小物質直耐勞唐俗儉嗇之風於越諫勁之習殆兼而有之矣

仙地山箐叢蠶舊志言生理之艱計然不能爲計然森林竹木藥品茶炭可培植也五金之鑛百菓之殖可講求也蠶桑之利絲茶綢布之業機坊工織之事可次第振興也歐洲比國境小而民最富德國地磽而工藝最盛人代天工地勢亦不能盡限之也

台之風俗其人樸靜其俗儉約吳荊溪子良記也閭閻興禮讓囹圄長榛蕪陳古靈襄詩也北宋時最號無事斗米百錢魚肉每觔三十錢薪柴蔬茹絕易得百姓富樂不識官府之嚴陳公輔臨海風俗記也今則由儉入奢日濡月染樸儉禮讓厥風大衰且好爭喜訟囹圄纍纍柴米魚肉價增十倍士多棄本逐末壯者散之四方甚或斥金如土豪舉揮霍中人之產不值宴客之一擲此係全國之憂不僅吾台之患歸真返樸殆未易借箸籌也

台古越地秦前棄弗屬見史記唐時猶爲貶謫之所見赤城志因地處叢山自昔聲教未通風土迫

隘大都僧寮居之依山卓錫遂成風氣其徒徧天下號天台宗浮屠盛而儒術衰勢固然也宋時台士漸興南渡後台爲輔郡人才始盛晦翁蒞止多士雲從吾台稱小鄒魯見宋濂集於是荒瘠僻左之地一變而爲名臣理學之邦是朱子之有造於吾台與台人之克自興起有足多者嗣後南湖學術樊川相業正學精忠皆奮乎百世之上近代淪替繼起乏人撫今思昔惕然愴懷杜方前型風流未沫豪傑之士固不必待文王而後興也

班志言會稽其民好勇輕死易發巧而少信晉志其氣諫勁厥性輕揚迄今二千餘年台地人情風土猶略近之一郡數百里內其俗大同而小異大約臨甯近於強梁天仙勇於鬪狠黃太鄰於澆懷強梁則使氣喜事平世不無梗頑之民亂世或多豪傑之士鬪狠則好爭喜訟械鬪肇禍視同固常黃太則民志雜糅強者怙勢窮者嗜利間或好名亦相訾警然六邑之內士子尙多自愛鄉氓服教畏神而治生儉嗇民勤稼穡商賈百工類多守分此其良也要之吾台隋唐以前猶爲荒僻今則生齒極繁風俗莫盛於宋今則無能爲繼舊志云俗誠有異轉移之則在人曾文正云風俗之厚薄視乎一二人之所嚮吾觀於吾台風俗盛衰升降之際有無窮之感也

台州府志 卷之十

台州府志卷六十一

風俗志下

漢志民函五常之性剛柔緩急音聲不同繫水土之風氣故謂之風好惡取舍動靜無常隨君上之情欲故謂之俗應劭亦言百里不同風千里不同俗蓋統理人倫移本易末混同中和教成匪易一國然一郡亦然台郡山海交錯峯巒盤互海濤衝噬鬱嶢而不得少舒其民跼蹐邊澁生計纖嗇性氣悞強方音蠻亟氓隸株株升斗較量絲粟鮮長駕遠馭之計臨海首縣版圖寥闊東南最廣延袤百餘里達於葭椒地瀕海俗嗜利尙氣富豪雄視鄉里習爲侈泰平民務農亦事漁業漁分南北兩派南岸集中葭沚北岸集中杜下橋魚利所在拍浪衝濤不避艱險海門舊設總鎮防營以戢奸宄僅有營船光緒中葉海輪始通甬東旣而通滬通甌商輪發展至十餘艘往來驛騷海門遂成通商巨埠阨六邑之咽喉五方雜厝豪猾姦民窟穴其間侈靡淫誕之風牙孽日盛然僅襲滬甬雛形商埠雖興商業未振徒飾外觀而中實無有所謂玉質金色乾若敗絮者也然地據海口爲台水入海總匯之區水陸輻湊百商鑽藁握全台利源關鍵臨海東南一雄鎮也迤北爲章安古回浦縣治迤西爲湧泉東北爲塗下橋又北爲花橋舊

縣承駐地皆市鎮也東南際海犬牙相錯統稱北岸其族強梁獷黠地險阻易藏姦盜悍者或入海行劫桐樹山桐坑時爲盜藪自花橋迤東數十里爲東塍又東爲大田市皆臨海東鄉獷勁頡頏北岸北爲黃壇大石中渡西北爲黃沙皆喜械鬪俗蠻梗近天仙迤西張家渡南爲油溪義城有市廛俗樸嗇民習樵探乏生計越義城爲黃巖西鄉甯溪烏巖柔極小坑其要地也俗儉苦山民終歲勤動治生竭蹶甯川以西尤荒瘠民鮮蓋藏儻衣藜食十室九貧自烏巖迤東茅畚頭佗橋較繁盛其次曰小澧橋曰瑞巖曰靈石舊有大佛寺寺旁有惺惺石有高僧終日坐盤石體認常惺心每自喚主人翁在否曰惺惺著今寺已廢改靈石書院迤東渡江越山頭周至焦坑南際松巖羣山環繞晉任功曹旭之故址谿谷最奇名勝地也山麓卹莊棊布迤邐至橋上街薄黃巖城北枕澄江北至黃土嶺縱十里橫二十餘里民俗靜樸鮮盜賊東障永甯山麓有九峯寺後圯同治間改建九峯書院院西建名山閣藏書數萬卷儒術驟興志士後先間出彬彬稱盛迤西行數百步有米篩井水清冽而甘異他泉稍南里許有梅花井水亦甘然不及遠甚故米篩井爲吾黃第一甘泉視鎮江之第一泉有過之無不及也舊有地管通城內學宮城隍廟兩處自同治間濬城內五支河而地管絕今水夫肩挑終日繹絡不絕資生業

焉縣南農田肥沃穀稔冠各鄉縣西地皆遠近城多橘木兼饒蔬菜近歲橘木環四城而北鄉尤盛然城北十里皆負山耕農兼業蕘柴木入市常擁擠礙行人故俗諺有東門水南門米北門柴西門茶豆茄之謠出南城里許有委羽山山後有洞道家名第二洞天爲劉真人羽化處稱勝地焉南曰沙埠曰院橋又南盤山繡嶺深叢廣谷民多巖居院橋旁有鑑湖視紹如驂之斬而聲名不著近楊給諫晨約父老修禊表章之亦名勝地也東南曰路橋爲商務繁盛之區北通縣治東通椒門徧達闔郡遠販甌甬黃巖東南一巨鎮也曰澤庫繁盛亞路橋而商務日興東南際海港嶼汙紛海濱廣斥塗漲歲增而姦商蠹民出沒其間劣者作姦犯科流爲盜藪鬧鹽劫海時生事端南曰太平縣明成化六年析黃巖置益以樂清下山六都富饒甲六邑沿海沙塗日增月廓與臨黃等迤東島嶼綦布大小數十處細岷墾地撩魚練習風濤岡忌寒暑而宵徒行劫時或竊發金清爲太平入海之要港百貨廣集船舶蒸蒸日盛而奸商漏米莠民販土匪類劫船黠徒騙竊層見疊出官不注意弊端積久時靖時發長老以爲憂歎然耕岷安畝畝多土著食稅衣租耑守分之民居多貧者勤而嗜利往往習勞起家富者浮華相尙豪家田連阡陌每多煙賭之癖任意揮霍而尚於待人計較錙銖習爲權算或傷鄙各南曰箬橫

松門橋下西曰大溪莘山北曰潘郎東曰新河其要區也自太平北迄甯海皆瀕海而甯海海
 綫最長自健跳北經牛頭洋至盤龍山百餘里內三門灣港嶼星羅蛇盤洋一帶海潮滂湃環
 繞又百餘里海物雜錯故東鄉號稱富饒由縣東出白嶠茶院瀝陽東滄抵西溪嶺與象山接
 壤東滄爲唐葉尙書裕宋葉丞相夢鼎故居今陵夷衰微矣迤南長街大湖多富室斤斤自守
 而鄉氓多囿舊習不勤生計贏蛤魚鹽之利不待賈而足餒於進取俗近些窳南鄉强悍海濱
 多匪亭旁東奧沙柳海游皆南鄉巨鎮而健跳巡檢司爲要區健跳有城明湯和築有魯王壘
 形勝地也海游舊縣治地爲南方奧區北鄰沙婁南接亭旁西南朱奧西北桑洲皆市鎮也民
 俗儉樸耐勞西北多山藝竹木而西店接奉化深叻通新昌五市梅林黃墩橋頭胡皆市場也
 以長街海游桑洲橋頭胡四市爲盛風俗東鄉弱南鄉蠻北鄉強西鄉膏物產南鄉瓜菜西鄉
 竹木豆麥東北魚米以時交易羨補不足其大率也工商業質鈍縣治宅中阻塞礙於交通而
 薛塢距城四十里滬甬鎮象商舶于鱗萃漸成要埠甯邑近甬商務步甬後塵故稍興盛然
 輦路藍縷視滬甬猶部婁耳西鄰天台山縣貧瘠俗儉而勤勤於農業寸地必墾北枕天台山
 山高萬八千丈多古刹山麓國清寺最大自隋唐以來興盛迄今千餘年不衰寺內法規甚嚴

游人甚盛賓至如歸名譟海內山寺華頂最高方廣最幽石梁赤城最奇迤西寒明二巖天然構造下可居人然地處僻遠游客罕至居其地者見聞鄙淺相傳得龐石壁登庸信莊前後四十八村一夕皆改姓龐里巷譚言至今稱述西鄉市鎮街頭平頭較大北通新昌西接東陽商販麩至然皆粟米鹽菜棗栗諸蕒之屬無甚異品居民耳目多隘東鄉杜榜眼之鹹塘江山第宅文藻闐然矣迤南石塘山頭等莊人煙稠密其中講求文學頗似城中邇來習尙漸侈婚娶喪葬競事華靡由儉入奢漸漬日盛邑鮮藏書見聞痼蔽游手無行多染惡習悍者羯羶不均械鬪之風尤盛或以細故釀成大爭釁端一啓開祠堂鼓闔族揭竿兩姓姻親戒絕往來格殺弗避言之駭聽民艱生計溺女之風亦盛仙居尤甚械鬪溺女兩縣別成風氣仙邑四面環山重岡疊嶂山地約占縣境十分之六沙灘占二平原占二而強糧短絀民多食藜麥雜糧謀生窘齋交通亦隘西阨蒼嶺北阻蟠松皆叢蠶鳥道攀磴覓途惟永安溪橫亙全境百數十里下水極順利而上水極難交通阻困商業全縣十七市以城市廈閣蟠灘橫溪田頭朱溪白塔七市爲盛張店懷仁楊府大路徐新路雙橋上張步路官路橋曹店十市次之物產穀麥菽豆薯芋麻苧茶棉朮菸竹木布礦等類以穀麥豆三種爲多然穀麥食不足苧少有輸出餘物出口

亦微故仙比天尤瘠然山水極清冽吾台之有天仙猶中國之有廣西地號貧瘠而山水清奇爲天下指目差強人意台雖僻處東南而山珍海錯隨地而有昔太公治齊修魚鹽之利民多歸齊諸侯聯袂而朝管仲設輕重魚鹽之利齊以富强遂霸諸侯故山海者不竭之藏也吾台府海官山天然大利惜無太公管子其人起而振之致坐失富强耳

山縣利樹藝海國利魚鹽官開其風而民安其俗其機始於至微而其後利源興盛沛然莫之能遏遂以殖富教之本原如此則俗厚而風長台山富竹木茶諸藥礦大野宜禾黃巖陸地宜橘苟能造林闢田野講樹畜推之蠶桑鑛業之利隨地講求皆不竭之富源至臨甯黃太四縣海綫之長綿亙數百里水族最繁取之無禁用之不竭尤天然之利源瀕海居民多半業漁南岸漁民南起鳳尾山北至韭山沿海淺塗設竹椿繫鰲有固定地如居國然其船有艫艚艨丁小航溜網船等類北岸船遠涉定海魚山島等處以紅頭對爲大宗舊有水刮船張網白岱山貓頭洋象山爵銘一帶後以船笨改造黑頭旋改紅頭兩船拖網成對所謂紅頭對也初漁戶往來近海後漸推廣鎮定奉象各地健者或北走崇明南距甌閩富冒險性紅頭漸多至千餘對張箔捕魚獲利頗厚然株守成法未能改良進步且不諳罐頭新法苟於魚汛盛時一面

鬻鮮，一面裝罐，舍舊圖新，日新月盛，近之可販全國，遠之可運歐美，雄風表海，事在人爲。近水產學堂，創辦有年，方在幼稚，尙鮮實效，苟能積極擴充，發揮利源，何難軼四明而追松滬。台俗習勤漁業，風氣早開，而講求不精，害馬未去，近年海盜充斥，官又巧取豪奪，如漁稅、護洋費、漁船牌照費、漁業登記費、頭會箕斂，名目繁多，更有水警及護洋等船，要截勒索，漁民內受債主之盤剝，外被警盜之侵蝕，畏首畏尾，振興無望，學校等於贅旒，苛政甚於猛虎，以言官山，則山木濯濯，皮之不存，以言府海，則官盜橫行，救死不贍，土風乃土匪之風，習俗乃苛吏之俗，官山漸成童山，府海變成苦海，以天然之利源，供若輩之刀俎，太公何人，管子安在，坐令吾台山海之利盡擲諸洪濤駭浪中，此賈生所以痛哭，君山所以流涕者也。

海空